

Headline	Penduduk luar bandar gembira		
MediaTitle	Utusan Malaysia		
Date	11 Jan 2019	Language	Malay
Circulation	112,050	Readership	336,150
Section	Dlm Negeri	Page No	9
ArticleSize	849 cm ²	Journalist	FADZLY IZAB
PR Value	RM 50,802		



"Tahniah dan syabas kepada TNB dapat menyiapkan projek rintis NFCP ini dalam tempoh yang singkat dan penting kepada rakyat negeri Melaka dari segi akses kepada internet berkelajuan tinggi bagi memacu ekonomi, pelancongan, pendidikan dan lain-lain lagi."

GOBIND SINGH DEO
MENTERI KOMUNIKASI
DAN MULTIMEDIA



"Kemudahan ini diharap dapat dimanfaatkan sebaiknya oleh rakyat Melaka amnya dan penduduk Jasin khususnya bagi membantu merencanakan pertumbuhan ekonomi negeri dengan akses jalur lebar berkelajuan tinggi."

KERK CHEE YEE
PENGURUSI JAWATANKUASA
KOMUNIKASI, MULTIMEDIA,
PEMBANGUNAN BELIA DAN
SUKAN MELAKA



"Projek perintis itu membuktikan komitmen TNB bukan sahaja untuk memastikan rakyat menikmati bekalan elektrik berdaya harap malah sentiasa menyediakan perkhidmatan terbaik di samping membantu memperkasa pengguna dari segi teknologi."

TAN SRI LEO MOGGIE
PENGURUSI TNB

Kemudahan NFCP rapatkan jurang digital berkelajuan tinggi masyarakat desa **Penduduk luar bandar gembira**

Oleh **FADZLY IZAB**
pengarang@utusan.com.my

■ JASIN 10 JAN.

SEBAHAGIAN besar penduduk di sekitar daerah ini yang terpilih bagi projek perintis Pelan Gantian Optik dan Kesalinghubungan Negara (NFCP) melahirkan rasa gembira kerana berpeluang menikmati kemudahan akses internet berkelajuan tinggi walaupun tinggal di luar bandar.

Inisiatif diperkenalkan kerajaan Pusat dengan kerjasama Tenaga Nasional Berhad (TNB) itu ternyata memberi nafas baharu kepada ribuan penduduk di kawasan terlibat untuk menikmati kemudahan sama seperti penduduk di bandar.

Menerusi projek yang pertama kali diperke-

nalkan di Malaysia itu, kira-kira 1,100 kediaman di Kuarters Polis Jasin, Taman Merbau Perdana, Taman Maju dan Felda Kemendor di sini kini mampu menikmati kelajuan internet mencecah satu gigabit sesaat (gbps) pada harga berpatutan.

Kakitangan awam dari Felda Kemendor, **Yusrefah Mohamed Ningal**, 48, berkata, usaha tersebut sangat dialu-alukan oleh masyarakat luar bandar yang turut tidak mahu ketinggalan dalam aktiviti ekonomi digital.

"Jika sebelum ini ramai antara kami merungut kerana capaian internet yang kurang bagus tetapi selepas ini masalah itu tidak lagi timbul walaupun kami menetap jauh dari kawasan bandar.

"Saya amat berharap usaha ini diperluaskan lagi ke semua kawasan luar bandar dan pedalaman kerana masih ramai lagi rakyat memerlukan akses internet yang pantas dalam aktiviti harian mereka," katanya ketika ditemui *Utusan Malaysia* di sini baru-baru ini.

Sementara itu, seorang pen-



GOBIND SINGH DEO (duduk, dua dari kiri) mencuba melayari internet menggunakan jalur lebar berkelajuan tinggi sambil diperhatikan **Leo Moggie** (duduk, kanan) dan **Kerk Chee Yee** (duduk, dua dari kanan) semasa melawat di rumah rehat Felda Kemendor di Jasin, Melaka baru-baru ini.



DUA penduduk Felda Kemendor, **Zuhaini Lip** (duduk) dan **Noriah Mohammad Arus** (duduk) dapat mengakses internet dengan mudah selepas perasmian projek rintis NCP yang memberi akses internet berkelajuan tinggi kepada 1,100 kediaman di Jasin, Melaka, baru-baru ini. — UTUSAN/AZLI AHAD

duduk Taman Maju, **Nordiana Ab. Kadil**, 34, berkata, dia tidak sabar beralih kepada pelan yang diperkenalkan TNB itu memandangkan pelan sedia ada dilanggannya kurang memuaskan.

"Kemudahan ini penting bagi saya sekeluarga malah kami banyak menggunakan capaian internet dalam aktiviti seharian termasuk menonton televisyen, membeli dalam talian,



NORDIANA



YUSREFAH



AMIR SAMAD

membayar bil dan lain-lain.

"Capaian internet yang perlahan selalunya menyebabkan urusan kami terganggu baik dari segi kerja mahupun aktiviti harian," ujarnya.

Dalam pada itu, seorang pesara tentera dari Felda Kemendor, **Amir Samad**, 60, memberitahu, inisiatif itu amat berguna kepada rakyat terutama golongan muda yang kini banyak bergantung dengan kemudahan internet bagi memudahkan urusan mereka.

"Golongan pelajar sekolah dan pelajar universiti amat memerlukan kemudahan internet berkelajuan tinggi seperti ini kerana tanpa capaian yang bagus, aktiviti pembelajaran mereka mungkin terganggu.

"Walaupun kurang penting bagi golongan warga emas seperti saya, tetapi kemudahan ini penting untuk generasi masa hadapan kerana hari ini, hampir semua perkara boleh dilakukan secara dalam talian sahaja," katanya.